



Meeqqanik kinguaassiutitigut atonerluisartut pillaatisinikunut nakorsartinnikkut kinguaassiutitigut atuinissamut piumasusaarutsitaanissamik (medicinsk kastration) aammalu meeqqat kinguaassiutitigut atonerlugaasimasutut sullinneqartunut tarnikkut ikiorserneqarnermut aningaasartuutit tamakkiisumik akiliisinneqartalernissaanik pisussaataasalernissaanik pillaatisisalernissaat pillugit oqallisissiatut siunnersuut.

(Inatsisartunut ilaasortaq Nivi Olsen, Demokraatit)

Qujarusuppunga Demokraatit Inatsisartunut ilaasortaataannut Nivi Olsenimut uuma oqallisissiap qaqinneranut, ajuatut aseruuttut assersuunneqarsinnaasumik uani piffissami saqqummiuummagu. Pisariaqartinneqarpoq, ajuaq qaartariaqassagipput meerartatta kinguaassiutitigut atonerlunneqartarnerisa iliuuseqarfiginiarsarinerani. Ajornartorsiutit amerlapput qulaajangassat assigiinngisitaartuullutillu oqallisigineqartussat. Oqallinnermut eqqarsaatersuuteqalaarlanga isiginneriaatsillu arlallit atorlugit.

Una oqallisissiaq alianartuinnaanngilaq. Aammali oqallisissiaq oqimaatsuuvoq. Sammisaaq oqimaatsuuugaangat, oqaasissaarussinnaasarpugut. Aamma qinigaagutta, sunut tamanut ersarissumik akissutissaqartuaannartutut oqalunnikkaallu isigineqarsinnaagaluarluta, tamanna isummerfigisallugu oqimaasinnaavoq. Immaqaana aamma tusarnaarnissamut pikkorinnerulertariaqartugut. Meeqqat tusarnaarlugit, meeqqallu naligalugit aamma inuiaqatigiinni innuttaasut tamaasa naligalugit, aalajangiissatilluta pingaartorujussuarni soorlu siunnersuut taama siunertaqarpassittoq.

Unnussiuuaqatigiinnermi, kammalaatikka taakkualu aappaat ilagalugit tupatsitsivunga, eqqartueqatigiinitsinni apeqqtigigakku ukiut atoqatigiinnermut killissarititaasut qanoq isumaqarfigineraat. Kammakalaatikkalu ima ukioqalersimavugut, meeqqagut inuusuttuaranngorsimallutik takusinnaallugulu, qanoq perorsimatigilerneru, aammali avatangiisiminnit ilagisartakkaminnillu sunnertiasuullutik. Angutit arlaata aperivaanga:

”Sooruna qinikkat taama nassuerutigisallugu ajornartitsigigaat, sunut tamanut immikkut ilisimasaqartuunnginnertik unneqarissumillu nassuerutigalugu, sammisat ilaasa oqimaatsuusinnaasut? Taamaaliornikkut qinikkatsinnut ajornannginnerusumik tarrarsorsinnaalissagaluarpugut”.

Oqaasii ilumoortortaqrput. Unneqarissuusariaqarpugut. Uatsinnut pisuutittaqattaaginnarata, partiit inunnut isiginnittaasaat allaniit ajornerusoq oqaatigiinnaqinagu, innuttaasut inuiaqatigiinni suna kissaatiginerat tusarnaartigit? Meerartatta qanoq misigisarnerat, atonerlunneqarnerminni, kingorna meeraq taassumalu ilaqutai kisimiilluinnartutut misigitinneqassapput, allaallumi angajoqqaat ilaat ikiorserneqannginnertik pinerliisulu sakkukippallaamik pillagaanera ajoralugu imminut akiniuttarlutik.



Pinerluttunik amerlanernik pilersitsiortulernerpugut meeqqatta pitsaanerusumik illersorneqarnissaminnik pisariaqartitsinerisa isiginngitsuusaarnerisigut? Apeqquterujussuaq.

Apeqqut soqutiginaatilik aamma unaavoq, ukiut atoqatigiinnermut killissarititaasut appasippallaamik inissineqarsimannginnersoq, Naalagaaffiit Peqatigiit 18 inorlugit ukiullit meeqqatut isigimmagit. Oqallinnermi sammivik taanna allaavoq, oqallinnermili killissatsinnik tikkuussinerulluni, tamannami aamma pisariaqarmat. Ingasammik inuusuttatut taamatut ukiullit, sunnertiasuullutillu atornerlunneqarsinnaasarmata, oqarta taakkuninnga angutinik arnanillu utoqqaanerujussuarnik.

Meeqqat atornerlunneqarnissaminnut illersorneqartussaapput. Tamanna toqqaannartumik Naalagaaffiit Peqatigiit meeqqat pisinnaatitaaffiitut isumaqatigiissutaani allaqqavoq. Tamanna aamma uagut malittussaavarput. Eqqaamavara, ukiualunnguit matuma siorna Kommuneqarfik Sermersuumi borgmesteri annertuumik kimigiiserfigineqarmat Tasiilami meeqqanut atugarliortunut tunngatillugu.

Tamanna politikikkut assoralisimaarnermik kinguneqarsimavoq, borgmesterillu tunuarneranik kinguneqarsimalluni. Tasiilami meeqqanik kinguaassiuutitigut atornerluineq pillugu qulequttat ersarilluinnartut ilagisimavaat, borgmesteri tusagassiuutitut nassuiaammat, Kommunip atornerluisuunnginnerarlugu. Borgmesterilu ilumoorpoq – kommuni toqqaannartumik meeqqamut atornerluisuunngilaq, akisussaaffigaali pinaveersaartissallugu, taama pisoqanngilluinnarnissaa, aammalu ikiorsiisoqarnissaa isumannaallisaatinik aallartitsinissaq meeqqat taassumalu ilaqutaasa kingunerlutsinneqannginnissaat.

Akulikipallaamik takusarparput, oqartussat sumiginnaanerat ingerlaannartoq, isumaqarpungalu inatsimmik unioqquטיםisimasumut kinguneritinneqartartut ersarissumillu malitseqartinneqartannginneri pissutaasut. Pinerluttulerinermi inatsisip qasungavallaamik pullaveqarnera ataqqqineqarneralu ingasappallaarpoq, eqqunngitsuliortorlu annertuallaamik inatsisitigut mianersuunneqarpallaarluni, eqqunngitsuliorfigineqartoq/meeraq pinnani. Uagut Demokraatinit tamanna allanngortikkusupparput – kinguneqartitsisarneq qaffakusupparput inuiaqatigiinni pisariaqarluinnartumik allannguerusukkatta, pinerlineqarsimasup inatsisitigut illersorneqarnera annertuumik pitsanngoriaateqassammat, inuiaqatigiillu annertunerusumik takutitsillutik meerartatta atornerlugaanerannut naaggaarluinnarlutik. Naammaleqaaq.

Pinngitsaaliineq kajumissutsimut sunniiniutaassaguni pitsaasumik kinguneqartussaangikkaluartoq, minnerpaamik eqqartuussissutip aalajangerneqarnerani atorneqartariaqarpoq katsorsartinnermik eqqartuussinikkut nakorsartinnikkut kinguaassiuutitigut atuinissamut piumassusaarutsitaanissamik (medicinsk kastraktion) isummernikkut. Qanga taamaattoqartarsimavoq. Atorneqartarsimavoq, inuit pisinnaatitaaffiisa aaliangertalernissaasa tungaanut katsorsaaitullu atorneqartarnera "peerneqarsimalluni". Inuit pisinnaatitaaffiitut ataqqinnikkaluarlunga isumaqarpunga, meeqqamut ajunngitsussaq illersortuassagipput sutigut tamatigut. Taannartaa pingaartinnerpaajuaannassavarput. Apeqqutaavoq, nakorsartinnikkut kinguaassiuutitigut atuinissamut piumassusaarutsitaanissaq suna siunertaralugu periarfissanngussanersoq inuit pisinnaatitaaffiitut tunngatillugu. Tamanna misissortariaqassaaq inatsisiliornermut tunngatillugu.



Meeqqanik atornerluisoq pineqaatissinneqarnikoq, ilimagisinnaavara, tupinnaannartumik qujaniassasoq, inatsit aqqutigalugu killilernerqaruni, tassami taassuma killissaa – pingaarnerusorlu – meeqqat killissai, qaangerneqarsimammat.

Isumaqarpungalu, uagut inuiaqatigiittut pineqartoq ikiorsinnaagipput sinaakkusiilluta aaliangiisumik inatsisunik unioqqutitsilluni iliuitsimut kinguneqartussamik, tassungalu ilutigalugu meeqqat inatsisitigut illersugaanera qaffallugu meeqqallu allat atornerlunneqaqqinnginnissaat qulakkeerlugu.

Apeqqummut tarnit pissusaanik ilisimasalimmik ikiorneqarnermut akiliussinissaq isumaqarpugut pissusissamisoortoq. Akuereqqammerparput, meeqqamut kinguaassiuutitigut atornerlunneqarsimasumut taassumalu angajoqqaavinut/oqartussaassusermik tigumminnittumut tarnip pissusaanik ilisimasalimmik ikiorsiinissarnissamik siunertalik. Taamaattumillu taanna apeqqusertariaqanngilarluunniit.

Nivi Olsen qutsavigeqqissavara apeqquteqaat aallaavigalugu oqallisissiaq pingaarutilik saqqummiummagu. Sapiissuseqarluni oqimaatsorlu saqqummiunneqarpoq, tassaniluuna siuariarnermik ineriartortitsinermillu pilersitsiniarsarisugut, meeqqatsinnut ikiorsiissutaasinnaasunik maannakkut pisariaqartitsinerinnaq pinnagu, aammali siunissami pinaveersaartitsinermik nukittunermik tunngviliisussaammat. Neriuppunga, inersuarimi tamatta pisariaqartitsineq takusinnaagipput saaffissaaleqaluni kiserliornerujussuaq inuiaqatigiitsinniittoq, maanna pinerluttulerinermut inatsisitta toqqaannartumik kingunerigaa, pitsaasunik siunertaqaraluarluni meerartagut amerlasuut toqqissisimananngippallaamik inuuneqartimmatigit.